

都也。至至正改元，歲屬辛巳，夏四月中，洞陽生祠像前見一槐，長數寸。閏五月，高七尺。其首也，秀而爲鳳形；其身也，化而爲龍鱗；其顛又齊生七柯，各長尺餘，雖畫師筆染之弗如，真瑞槐也！願先生爲之記。其不可乎？予謂曰：「蓋瑞之爲物，精華而昭著也。槐之爲木，堅慤而茂榮也。秀而爲鳳，非精神而昭著乎？化而爲龍，非堅慤而茂榮乎？鳳兮龍兮，詎非表洞陽生斯世之太平有慶，闡斯道之應變無窮也耶？不然，昔龍馬負圖出於河，伏羲之瑞也；鳳鳴於岐，文王之瑞也；豈非伏羲、文王聖道之所致乎？」此槐在祠之裏，像之前，無雨露之澤所潤，無山川之氣所蒸，不過十旬而高七尺，是知洞陽道業昭著，仙基茂榮，呈瑞而爲槐者也。據乎青氣貫宮者，洞陽也；白鶴盤空者，顯道也。氣之精華，秀而爲鳳，爲瑞；志之堅慤，化而爲龍，爲槐；是忠貞之膺所感而致然也。因爲之作歌曰：

洞陽誕世真天人，聲名揚溢寰區新。琳宮深閉久不出，皇家賜號爲仙真。德崇業廣致生意，綠槐如鳳如龍鱗。時人驚異以爲瑞，徵我作記述以文。鐫諸翠瑱傳不朽，萬古清風人所聞。鄉貢進士絳臺錦坡廉維方頓首。（民國二十三年《續陝西通志稿》卷一六六 魏崇武校點）

雷 復

雷復，江西龍興府南昌縣（今江西南昌）高安鄉仁信里濱湖村人。至正間在世。本書收雷復文一篇。

地券文 至正四年十二月

維大元國江西道龍興府南昌縣高安鄉仁信里瀆湖村東保居，嗣男雷復、豫、豐，今奉先考先妣靈柩安葬。復等立券於是，昭告土神曰：先考生於戊戌年十月初十日戌時，今於甲申年五月二十九日歿，享年四十九歲。先妣生於丙申年十月初三日巳時，今於甲申年十月十七日歿，享年四十九歲。今就於甲申年十二月十八日辛酉吉日，同穴安葬。質之著龜，罔不協吉。謹秉心爲緡，奉誠爲幣，就開皇真主買地一穴。□□□□龍巽離，厥山懺湖之西，坐西向卯。左挹蛟溪之朝水，源清流長；右護游湖之佛堂，鐘鳴鼓擊。前植詩書之脉，筆峰墨池；後恢金谷之匡，飯山財案。照於上，則星明宿麗；載於下，則土潤基深。幽室中居，靈魂內□。丘丞墓伯，常切護持。邪魅妖魔，□令干犯。風藏氣聚，草秀木榮。福蔭子孫，光增宗祖。是券既立，所願皆從。惟爾有神，鑒於至意。謹告。嗣男雷復、豫、豐立。（江西教育出版社一九九一年版《江西出土墓誌選編》附錄）